

इवनिंग डोगरी न्यूज़ बुलेटिन

समे 18:15 Hrs

<><><><><><>

Headlines

- 1.** जम्मू-कश्मीर विधानसभा नै अज्ज प्राइवेट युनिवर्सिटिं सरबन्धी बिल पास करी दिता। मुखमन्त्री होरें आखेआ जे स्हाड़े नौजवानें दा भविक्ख सोआरने बक्खी एह इक महत्वपूर्ण गें ऐ।
- 2.** सरकारै आखेआ ऐ कि सावलकोट परियोजना लेई पुनर्वास ते बंदोबस्ती योजना त्यार करी लैती गेदी ऐ।
- 3.** शिक्षा मन्त्री स्कीना इत्तू होरें आखेआ ऐ कि स्कूली शिक्षा मैहकमा शिक्षा ढांचे गी मजबूत करने ते स्कूलें च अध्यापकें दी उपलब्धता जकीनी बनाने बक्खी चेचा ध्यान देआ'रदी ऐ।
- 4.** जम्मू-कश्मीर विधानसभा दा बजट इजलास अज्ज मुक्की गेआ विधानसभा दी कारवाई अनमित्थें समें लेई स्थगित।
- 5.** ते समूलचे जम्मू-कश्मीर च औंदी 10 तरीक तगर मौसम आमतौर पर गड़बड़ी आहला बने दा रौहग- बरखा ते बर्फबारी दे असार।

<><><><><><>

CM Pvt. Universities Bill

मुख्यमंत्री उमर अब्दुल्ला हों आखेआ जे जम्मू-कश्मीर विधानसभा नै अज्ज निजी युनिवर्सिटियें सरबन्धी बिल गी पास करी दिता ऐ जेहड़ा नौजवानें दे भविक्ख गी आकार देने दी दिशा च इक महत्वपूर्ण गेंसु ऐ। मुख्यमंत्री हों इस ऐतिहासिक कन्नू दे पारित होने पर शिक्षामंत्री स्कीना इत्ते होंनें मुतलका धड़े गी मुबारकबाद दिती। मेद कीती जा'रदी ऐ जे इस विधेयक कन्नै जम्मू-कश्मीर च म्यारी उच्च शिक्षा दे नमें रस्ते खुलगंन। विद्यार्थियें गी खिते शा बाहर जाने दी लोड़ घटी जाहग ते मन्ने-परमन्न दे संस्थानें गी जम्मू-कश्मीर च निवेश करने लेई आकर्शित कीता जाई सकोग।

<><><><><><>

Sawalkote R&R Plan

सरकार नै अज्ज विधानसभा गी जानकारी दिती जे सावलकोट पन-बिजली परियोजना लेई इक व्यापक पुर्नवास ते बंदोबस्त सरबन्धी योजना त्यार कीती गई ऐ- जिसी मकामी समुदाय पर पौने आले असर गी ध्यानै च रखदे होई त्यार कीता गेआ ऐ। एह गल्ल जलशक्ति मंत्री जावेद अहमद राणा हों विधायक पवन कुमार गुप्ता हुंदे आसेआ पुट्टे गेदे इक सोआले दा परता दिंदे होई आक्खी। मंत्री हों मुख्यमंत्री उमर अब्दुल्ला हुंदी थाहर पर परता देआ'रदे हे। उ'नें आखेआ जे पुर्नवास योजना च जिमी मालकें लेई मुआवजें दे उपास ते सब्बनें प्रभावत जिलें आस्तै वाजिब तौर-तरीकें मताबक पुर्नवास ते ओहदे मुत्तल्लक अधिकार बी शामिल न।

<><><><><><>

Itoo- SED

शिक्षामंत्री स्कीना इतू होरें अज्ज आखेआ जे स्कूली शिक्षा विभाग मौजूदा बुनियादी ढांचे गी मज़बूत करने ते जम्मू-कश्मीर च पैहले थमां गै दर्जा बधाए गेदे स्कूलें च अध्यापकें दी लोड़चदी उपलब्धता गी यकीनी बनाने पर ध्यान केन्द्रित करा'रदा ऐ। मंत्री होरें एह गल्ल अज्ज विधानसभा च विधायक रफीक अहमद नाइक हुंदे आसेआ स्कूलें दा दर्जा बधाने बारे पुच्छे गेदे सोआलें दा परता दिंदे होई आक्खी। इतू होरें आखेआ जे मौजूदा समें च बुनियादी ढांचे गी मज़बूत करने ते पैहले थमां गै दर्जा बधाए गेदे स्कूलें च टीचरें दी लोड़चदी बवस्था गी तरजीह देआ'रदा ऐ।

<><><><><><>

Dar -Farming Activities

राई-बाई मैहकमे दे मंत्री जावेद अहमद डार होरें अज्ज विधानसभा गी जानकारी दिती जे जम्मू-कश्मीर च मजूदा रूतै दौरान राई-बाई सरबंधि गतिविधियें दे समर्थन लेई केंई उपास सरकारै पैहले गै करी लैते देन। विधायक गुलाम अहमद मीर हुंदे आसेआ शून्य काल दौरान पुट्टे गेदे इक सोआलें दे परते च मंत्री होरें जानकारी दिती कि सरकारै पैहले गै सरबंधित मैहकमे गी आक्खी दिता ऐ कि करसानें ते बागवानें गी उन्दे कम्मै लेई समें-सिर ईंधन दी पूरी बवस्था रक्खी जा। उ'नें जोर देइयै आखेआ करसानें गी कुसै चाल्ली दी कोई दिक्कत पेश नेंई आवै- एहदे लेई सरबंधित प्रशासन गी बी निर्देश देई दिते गेदे न।

<><><><><><>

Rana- PHE Thefts

सरकारें अज्ज विधान सभा गी जानकारी दिती जे PHE दे ट्रांसफार्मर ते होरनें उपकरणें दे चोरी आहले मामले च बकायदा तुरत कारवाई करदे होई FIRआं बी दर्ज कीतियां गेइयां न। एह जानकारी जल शक्ति मंत्री जावेद अहमद राणा होरें अज्ज विधानसभा च विधायक देवयानी राणा हुंदे आसेआ आंदे गेदे ध्यान दोआओ नोटिस दे परते च दिती। सरकार दे धेइए गी पक्का करदे होई उ'नें आखेआ जे सार्वजनिक सम्पत्ति दी हिफाजत ते इस चाल्ली दियें घटनाएं कोला बचने लेई सब्बे लोइचदे उपास कीते जा'रदे न। मंत्री होरें आखेआ कि जल जीवन मिशन तैहत 3 जहार 253 स्कीमां जां ते पैहले गै तोइ चाढी गेदियां न जां मुकम्मल होने दे कोलकाल न।

<><><><><><>

LA -Adjourn Sine Die

जम्मू-कश्मीर विधानसभा दे अज्ज अनमित्थे समें लेई स्थगित होने दे कन्नै गै दंऊ गेडे च लग्गे दा बजट इजलास अज्ज सम्पन्न होई गया। बजट इजलास 2 फरवरी गी जम्मू च शुरु होआ हा ते 20 फरवरी गी रमजान ते ईद दी पछोकडै च इसी वक्फा दिता गेआ हा। ओहदे बाद 27 मार्च गी एहदा दुआ गेइ शुरु होआ- जिस दौरान 2026-27 बरे दे बजट पर बैहस ते मंजूरी दे कम्मै गी तोढ चाढेआ गेआ। अज्ज इजलास दे मुक्कने मौके पर स्पीकर अब्दुल रहीम राथर होरें जानकारी दिती कि इजलास दौरान विधानसभा दियां कुल 22 बैठकां लग्गियां। स्पीकर होरें दस्सेआ जे इस दौरान लगभग 111 घंटे कम्म होआ। उ'नें सब्बनें मिम्बरें ते मंत्रियें दी इजलास गी लेइयै निश्ठा दी सराहना करदे होई उन्दा धन्नवाद कीता।

<><><><><><>

LA- Uproar

बजट इजलास दे अज्ज खीरी रोज जम्मू-कश्मीर विधानसभा च अज्ज डंड-रौली बी दिक्खने गी लब्बी- कीजे नैशनल कांफ्रेंस- कांग्रेस ते PDP दे मिम्बर हाल च गांदरबल च छिड़े दे टाकरे दी न्यायिक जांच दी मंग करा'रदे हे। 31 मार्च गी अरहाना दे जंगलै च छिड़े दे इस टाकरे च जेहड़ा आदमी रशीद अहमद मुगल मारेआ गोआ हा- फौज नै दावा कीता हा जे ओ इक आतंकवादी हा- जिसलै कि ओहदे परिवार आहलें इसी फर्जी एनकाउंटर करार दिंदे होई इस दावे गी खारज कीता ते आखेआ हा कि उस आदमी दा आतंकवादियें कन्नै कोई लैना-देना नैई हा। अज्ज बड्डलै जियां गै सदन कारवाई लेई किट्ठा होआ BJP गी छोड़ियै सब्बे मिम्बर जिंदे च सत्ताधारी ते विपक्ष दे मिम्बर बी शामिल हे। इस घटना दी मज़म्मत करदे होई स्पीकर हुंदी तरफा एहदे पर ब्यान दी मंग करन लगगी पे। उन्दी चिंताएं पर प्रतिक्रिया दिंदे होई स्पीकर होरें सदन गी जानकारी दिती कि एल.जी होरें इस मामले च समें-बद्ध जांच दा हुकम पैहले गै जारी करी दिता दा ऐ।

<><><><><><>

Pvt. Electoral Rolls

राजौरी जिले दे बन्ने आले ब्लाक इंगी ते ढांगरी च अज्ज इक वशेष पंचैत चुना समीक्षा शिविर दा आयोजन कीता गोआ। इस कैम्प च बड़ी बद्ध गिनतरी च मकामी लोकें दी सक्रिय हिस्सेदारी दिक्खने गी लब्बी। इस दौरान लोकें गी बक्ख-बक्ख चुनां सरबंधी सेवां उपलब्ध करोआइयां गेइयां- जिंदे च मतदाता सूचियें दी बशेष नजरसानी- नमें वोटरें गी सूची च शामिल करना ते अयोग्य मतदाताएं दे नां हटाना वगैरा शामिल ऐ। एदे इलावा उ'नें नागरिकें गी मतदाता सूची च अपना नां दर्ज करोआने लेई प्रोत्साहित करने पर चेचा जोर दिता गोआ- जेहड़े हाल च गै 18एं बरे दे होई गे न।

<><><><><><>

Weather

मौसम विभाग केन्द्र- श्रीनगर नै मौसम सरबन्धी ताज़ा जानकारी जारी करदे होई चेतावनी दिती ऐ जे 10 अप्रैल तगर समूलचे जम्मू-कश्मीर च मौसम दे हालात खराब बने दे रौहगंन। अज्ज मते सारें इलाकें च रुकी-रुकियै हौली शा दरम्यानें दर्जे दी गरज-चमकिए बरखा ते बर्फबारी- ऐहन- गड़े ते तेज ब्हाए झुल्लने दी खबर ऐ। उच्चियें थाहरें च दरम्यानें शा भारी बरखा ते बर्फबारी होई सकदी ऐ। 7 शा 9 अप्रैल तगर केंई इलाके च बरखा ते बर्फबारी दा इक होर दौर होने दी पेशनगोई कीती गई ऐ। अधिकारियें बसनीकें गी सलाह दिती ऐ जे ओह एहतियात बरतन ते मौसम सरबन्धी सलाह ते जानकारी हासल करदे रौहन।

<><><><><><>